




ԸՆԴՈՒՆԵԼՈՒԹՅՈՒՆՆԵՐ ՄԱՅՐ ԱԹՈՌՈՒՄ

Ն.Ս.Օ.Տ.Տ. ԳԱՐԵԳԻՆ Բ ԱՄԵՆԱՅՆ ՀԱՅՈՑ ԿԱԹՈՂԻԿՈՍՆ ԸՆԴՈՒՆԵՑ ԴԱՏԱՎՈՐՆԵՐԻ ՄԻՋԱԶԳԱՅԻՆ ՄԻՈՒԹՅԱՆ ՏԱՐԵԿԱՆ 51-ՐԴ ՀԱՄԱԺՈՂՈՎԻ ՄԱՍՆԱԿԻՑՆԵՐԻՆ

Մեպտեմբերի 9-ին Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսը Մայր Աթոռ Սուրբ Էջմիածնում ընդունեց Դատավորների միջազգային միության տարեկան 51-րդ համաժողովի մասնակիցներին:

Նորին Սրբությունը ողջունեց աշխարհի 53 երկրներից Հայաստան ժամանած դատավորներին՝ ուրախություն հայտնելով Հայաստան և Մայր Աթոռ Սուրբ Էջմիածին նրանց այցի առիթով: Հանդիպման ընթացքում անդրադարձ եղավ դատավորի կարևոր դերակատարությանն արդար հասարակություն կերտելու գործում: Այս առնչությամբ Նորին Սրբությունն ընդգծեց, որ արդարադատությունը պիտի նպաստի բարության ամրապնդմանը հասարակական կյանքից ներս: Վեհափառ Հայրապետը նաև անդրադարձավ Հայաստանյայց Առաքելական Սուրբ Եկեղեցու առաքելությանը հայ ժողովրդի կյանքում:

Նույն օրը համաժողովի մասնակիցները շրջեցին Մայր Աթոռում և թանգարաններում՝ ծանոթանալով ամենայն հայոց հոգևոր կենտրոնի հոգևոր-մշակութային արժեքներին:

Ն.Ս.Օ.Տ.Տ. ԳԱՐԵԳԻՆ Բ ԱՄԵՆԱՅՆ ՀԱՅՈՑ ԿԱԹՈՂԻԿՈՍՆ ԸՆԴՈՒՆԵՑ ՉԵԽԻԱՅԻ ՍԵՆԱՏԻ ՆԱԽԱԳԱՀ ՊՐԵՇՄԻՍԼ ՍՈԲՈՐԿԱՅԻՆ

Մեպտեմբերի 13-ին Մայր Աթոռ Սուրբ Էջմիածնում Ն.Ս.Օ.Տ.Տ. Գարեգին Բ Ծայրագույն Պատրիարք և Ամենայն Հայոց Կաթողիկոսն ընդունեց Չեխիայի Սենատի նախագահ Պրշեմիսլ Սոբորկայի գլխավորած պատվիրակությանը:

Ողջունելով հյուրի այցը ամենայն հայոց հոգևոր կենտրոն՝ Վեհափառ Հայրապետը համառոտ ներկայացրեց պատմության ընթացքում Հայաստանյայց Առաքելական Սուրբ Եկեղեցու անցած դժվարին ուղին և առաքելությունը հայ ժողովրդի կյանքում: Նորին

Սրբությունը գոհունակությամբ արձանագրեց, որ այսօր երկիրն ազատ ու անկախ է, և Եկեղեցին հնարավորություն ունի ազատորեն իրականացնելու իր առաքելությունը:

Ամենայն Հայոց Կաթողիկոսն ուրախություն հայտնեց, որ Հայաստանի և Չեխիայի միջև հարաբերությունները ջերմանում և առաջընթաց են ապրում, ինչը պիտի բարի արդյունքներ բերի երկու ժողովուրդներին: Նորին Սրբությունը նաև շնորհակալություն հայտնեց Չեխիայի իշխանություններին հայ համայնքի նկատմամբ ցուցաբերվող հոգատար վերաբերմունքի համար:

Իր հերթին Պրշեմիսլ Սոբոդկան, շնորհակալություն հայտնելով ընդունելության համար, մեծապես կարևորեց Հայ Եկեղեցու դերը հայ ժողովրդի կյանքում՝ ընդգծելով պատմության ընթացքին Եկեղեցու գորակցությունը ժողովրդին, և ապա անդրադարձավ երկու երկրների միջև առկա հարաբերություններին և համագործակցությանը:

Հանդիպման ընթացքում անդրադարձ եղավ տարածաշրջանում խաղաղության հաստատման ու ամրապնդման անհրաժեշտությանը: Որպես մեծագույն արժեք նկատելով ժողովուրդների ազատ ու խաղաղ կյանքը՝ մեծապես կարևորվեց Լեռնային Ղարաբաղի խնդրի կարգավորումը բանակցային խաղաղ գործընթացի շրջանակում:

Ն.Ս.Օ.Տ.Տ. ԳԱՐԵԳԻՆ Բ ԱՄԵՆԱՅՆ ՀԱՅՈՑ ԿԱԹՈՂԻԿՈՍՆ ԸՆԴՈՒՆԵՑ «ՌՈՒՍԱԿԱՆ ԽՈՍՔԻ ՕՐԵՐԸ ՀԱՅԱՍՏԱՆՈՒՄ» ՆԱԽԱՁԵՆՈՒԹՅԱՆ ՄԱՍՆԱԿԻՑՆԵՐԻՆ

Մեպտեմբերի 14-ին Մայր Աթոռ Սուրբ Էջմիածնում Ն.Ս.Օ.Տ.Տ. Գարեգին Բ Օայրագույն Պատրիարք և Ամենայն Հայոց Կաթողիկոսն ընդունեց «Ռուսական խոսքի օրերը Հայաստանում» միջոցառման շրջանակներում Հայաստանում գտնվող ռուս անվանի գրողների, գրականագետների, խմբագիրների և լրագրողների պատվիրակությանը՝ գլխավորությամբ Հայաստանի հետ բարեկամության և համագործակցության ռուսաստանյան ընկերության նախագահ Վ. Վ. Կրիվոպոլսկովի և ուղեկցությամբ Զորի Բալայանի:

Հանդիպմանը Նորին Սրբությունը Հայրապետական իր օրհնությունն ու գնահատանքը հայտնեց «Ռուսական խոսքի օրերը Հայաստանում» նախաձեռնության կազմակերպիչներին՝ կարևոր նկատելով նման միջոցառումների անցկացումը հայ և ռուս ժողովուրդների միջև առկա բարեկամության առավել ամրապնդման համար:

Իրենց հերթին նախաձեռնության մասնակիցները ներկայացրեցին անցած օրերի իրենց տպավորությունները: Ներկաները կարևոր նկատեցին նաև Հայ Առաքելական և Ռուս Ուղղափառ Եկեղեցիների դերը երկու հավատակից ժողովուրդների հումանիտար և մշակութային կապերի պահպանման և զորացման գործում:

Հանդիպման ավարտին պրն Կրիվոպոլսկովը հանուն Հայաստանի հետ բարեկամության և համագործակցության ռուսաստանյան ընկերության Վեհափառ Հայրապետին հանձնեց Վալերի Բրյուսովի անվան շքանշան՝ ռուս-հայկական հումանիտար և մշակութային կապերի զարգացման մեջ կարևոր ներդրում ունենալու համար: